

Cultura >

La festa da Persepolis il 1971

Mes schef, il schah da la Persia – regurdanzas rumantschas

37 kilometers saida, 50'000 utschels ed in'obasa amez il desert iranais – quai che tuna sco ingredienzas per ina praula da 1'001 notgs è stada la festa per il 2'500avel giubileum dal reginam da la Persia.

Isabelle Jaeger
Actualisaziun: ler, 17:51

«Oz pon ins dir che quai è stada la festa dal tschientaner», di Rudolf Pazeller, quella giada in giuven cuschinunz da Tarasp. El era entamez tut questa opulenza, cura ch'il schah da la Persia ha festegià cun in spectacul mai vesi.

Il motto dal schah per sia festa: «Why not the best?»

L'imperatur da la Persia, il schah Mohammad Reza Pahlavi, na vuleva festivar nagut auter che la renaschientscha da la civilisaziun iranaisa. Sco giast celebrà da San Murezzan saveva el tge che luxus era e perquai è il motto stà cler: per la festa a Persepolis bastava mo il meglier dal meglier.

« Quai è stada ina pretensiun ch'el aveva envers nus tuts che lavuravan là. Daco betg il meglier – why not the best? »

Rudolf Pazeller
perditga dal temp ed il 1971 cuschinunz a Persepolis

Quai era er il motto da Rudolf Pazeller, in giuven cuschinunz da Tarasp, ch'era vegnì grazia a ses bab – concierge en l'hotel Palace a San Murezzan – en la cuschina dal schah a Persepolis.

Per quest eveniment n'aveva il schah laschè sgular betg be mangiativas, biancaria ed argentaria amez il desert iranais, mabain era cuschinunzs e cameriers da Paris e San Murezzan.

Da San Murezzan a Persepolis

Il schah da la Persia aveva ina colliaziun speziala cun la Svizra, raquinta Sacha Zala, professer per istorgia nova a l'Universitad da Berna e directur dal posta da perscrutaziun Dodis. Uschia saja il monarc iranais vegnì per pliras raschuns adina puspè en Svizra e surtut a San Murezzan. Per l'ina pervia da la colliaziun persunala, per l'autra era pervi da politica ed il prestige social.

« Il onns 1960 e 1970 era San Murezzan il lieu d'inscunter per il jetset internaziunal e damai era per il schah e sia famiglia. »

Sacha Zala
professer d'istorgia e directur Dodis, Berna

In zic da quest prestige internaziunal ha el importà perquai era da San Murezzan a sia festa da Persepolis. Oswald Toutsch barmier, da lez temp camerier al Palace Hotel San Murezzan, era intgantà d'esser vegnì dumandà per ir a servir a quai che la pressa sgiagliada da tut il mund numnava la festa dal tschientaner.

In sguard davos las culissas

Las preparativas per la festa dals 12 als 14 d'october 1971 èn stadas giganticas. Ella ha già lieu en ina citad da tendas fatgas da 37 kilometers saida.

Per vegnir a Persepolis aveva il schah laschè bajegiar in'autostrada da 1000 kilometers da Teheran a Persepolis. Per ils radund 600 giasts da 69 pajais eran vegnids sgulads 18'500 kilograms mangiativas. Per ils dus giuvenus rumantschs, Rudolf Pazeller ed Oswald Toutsch, miraclas, co quai ch'els descrivan il 1972 en in'emissiun dal post da program Cuira:

« Finalmain arrivads a Persepolis ans crudavan bunamain ils egls or dal chau cun vesair tut questa pumpa e miraclas, construidas bel ed aposta per ina festa che dura dus dis – in pitschen paradis per in pèr preferids. »

Oswald Toutsch
camerier a Persepolis il 1971

Enormas èn era stadas las mesiras da segirezza. Mintga camerier vegniva escortà d'in schuldà e las buttiglias da vin na vegnivan betg degustadas mo pervi dals cucuns, mabain pervi d'attentas da tissi. Igl era ina festa extraordinaria en tut las dimensiuns.

L'Iran e la festa da Persepolis

Extraordinarias eran numnadamain era las spaisas. Uschia rapporta la televisiun svizra:

« Tut en tut ha pajà il stadi iranais 2,5 milliardas francs per il pli grond inscunter da promis dal mund, nua che tut ils monarcs da quest mund, divers presidents da stadis ed auts represchentants da 69 pajais eran envidads. »

Panorama der Woche (DRS)
18-10-1971

La fin dals quints n'era la festa da Persepolis betg il cumenzament dad ina nova era, ma il cumenzament da la fin dal schah.

Memia gronda era la povradad da la populaziun, memia raffinads ils mullahs che savevan incendiar la ravgia da las fullas a tala maniera, ch'il pajais è crudà en ils mauns da la revoluziun islama il 1979 – ed il schah Mohammad Reza Pahlavi ha stuì fugir da ses pajais.

RTR Marella 11:00

Dapli dal tema